



Vita de ploania y de paisc

- **Pissies por Pasca** - enformaziun dal consei de ploania: en **jöbia ai 3 d'aorí** vegnel tegnì ales 19:00 na **funziun penitenziala** por döta la comunité desco preparaziun ala pissia; en **jöbia ai 10 d'aorí** dales 19:00 ales 20:00 sará signor ploan y don Marco a disposiziun por le sacramont dla confesciun. La pissia dai scolari sará en **sabeda ai 12 d'aorí**, da doman do messa.

1 Enformaziuns y termins

KVW Senioreclub: en dedemesaledema ai 2 d'aorí gnunse a La Pli a cianté les Staziuns ales 14:30 y en jöbia ai 3 d'aorí piunse ia con le Mareobus ales 8:50 dal Cone demez por jí a Mellaun y danló a pe a sant'André. Se tolun do val te rucsoch.

Iade a Assisi: l'Unité Pastoral Val Badia envieia chi co fej val' sorvisc por le ben dla dljija tles cöres dla Val Badia a n iade a Assisi con Christian Ferdigg **dai 27 ai 30 de otober** (3 nets). Al é ca 50 posc y le cost por porsona tla ciadena dopla o tripla é de 320 €. Tal prisc a porsona él le bus y les 3 nets tal Hotel La Rocca con gosté y cena. Iscriziuns y enformaziuns pa Holimites, ☎ 0471 838022 email: iadi@holimites.com

Ciasa de Palsa da San Martin enformeia che da otober 2025 ennant dál indò la poscibilité da fá la **formaziun da operadú:essa sozio-sanitar:a** (Pflegehelfer:in) te un n ann a Toblach y/o Porsenú. La formaziun é finanziada dla Provinzia da Balsan y dla Ciasa de Palsa Ojöp Freinademetz. Dertan la formaziun él preodü da ciáfé n contrat de laur tla Ciasa de Palsa da San Martin olache la formaziun pó gní fata dertan l'orar de laur y an á ensciö tres fora na retribuiziun. Por plü enformaziuns y por l'iscriziun, cherda sö le ☎ 0474 524786 o scrí a jobs@ciasadepalsa.it anter i 11.04.2025.

La Ciasa de Palsa da San Martin met a jí concursc publics por ejams y por mobilité anter enc por plü posc de rode desco operadú:essa soziosanitar:a (IV cualifica funziunala), desco operadú:essa sozioassistenzial:a (V cualifica funziunala) y desco infermier:a profesional:a (VII ter cualifica funziunala) Enformaziuns plü menüdes sön www.ciasadepalsa.it o ☎ 0474 524786.

Le Raiun sozial Val Badia envieia en dedemesaledema ai 9 de aurí ales 19:30 tal Salf di Stödafüch a San Martin de Tor al referat "Quando tra mamma e papà c'è violenza, i bambini non possono scappare! Il dramma della violenza assistita" con la psicologa Giuliana Franchini. Les consequenzes por i mituns co mess vire, odei violenza te familia sii tl'infanzia co ince tl'eté adulta.

Pelegrinaje: al vegn organisé en pelegrinaje a Medjugorje dai 7 de ma ai 12 de ma (6 dis). Prenotaziuns pa Agostini Daniele, ☎ 335 5268546 o Patrizia, ☎ 347 7537887.

Döt le bun a: Giovanna Pedevilla, *Bornech* * 04.04.1934
Gustl Winkler * 04.04.1937
Pasquale Alberto Pedevilla * 04.04.1942
Maria Lanz Pedevilla * 04.04.1950
y a düc chi co á santennom y compless i agn cöst'edema

Impressum: Ploania d'La Pli; redaziun Franz Rigo, Roman Frontull, Manuela Runggaldier
Comunicaziuns: cina le dedemesaledema sera a Franz Rigo, ☎ 347 2310129 o ✉ ploania@gmx.net
Download plata: www.unitepastorala.org



Plata dla Ploania La Pli de Mareo Santa Maria dal Bun Consei

Ploan: Signor Klaus Sottsas
✉ klsottsas@rolmail.net

Calogna Al Plan: ☎ 0474 501006
Radio de Ploania: 93,00 MhZ

UNITÉ PASTORALA



VAL BADIA
www.unitepastorala.org

Ann C

30.03.2025 - Cuarta domegna de Carsema "Laetare"

n. 18

I ó jí da mio Pere y ti dí: Pere, i á fat picé cuntra le ci y cuntra té.

(aclamaziun dan le Vangelo)

📖 **ios 5, 9a.10–12 | 2 Cor 5, 17–21 | Lc 15, 1–3.11–32**

Te nosta vita tolunse gonot la strada falada y tomun tal picé. Canch'i orun loé sö y dé ota odunse ch'i sun massa debli da le fá da susc. La Bibia cunta entres endò che Chel Bel Dio n'arbandoneia nia so popul d'Israel, y ensciö gnanca nos. Le popul d'Israel s'á ince laota destaché da d'El y á porchel mossü la tegnì fora carant'agn tal desert, denant co roé tla tera empormetüda. Mo ince enló s'á Chel Bel Dio fistidié de d'ei y ti á dé le mana (1ª letöra). Con Gejú Crist anse ciáfé la poscibilité da podei meter man da nò. San Paul dij: "Dio á ciarié nüsc picés sön chel co n'á nia conesciü le picé por che nos gnesson te el iustizia de Dio", y ensciö gní na creatöra nea. La parabola de Gejú tal vangelo se mostra Chel Bel Dio desco en bun pere co aspeta so fi pordü. Te söa gran misericordia sen ven Chel Bel Dio ince adencuntra a vignönn de nos, canch'i dun ota por arjunje endò la ciasa dal pere. da "Bibia di Sandís"

Dal Vangelo do San Lúca:

Te chel tomp¹ea düc i publicans y i piciadus gnüs da Gejú a l'ascuté.²I farisés y i stüdiés dla lege brunterà porsora y dijea: Al se dá jö con i piciadus y mangia cinamai empara.³Sön chera ti ál cunté na parabola y á dit: ¹¹N el á dui fis. ¹²Le plü jonn de chisc á dit a so pere: Pere, dámo la pert dala ierpejun co mo speta. Ensciö á le pere partí sö so avei. ¹³Do püc dis á le fi plü jonn pochené döt adöm y s'an é jü te n paisc dalunc. Danló ál vit na vita desliada y á spaterlé ia so avei. ¹⁴Mo do ch'al á albü desmandré döt cant, él gnü na gran ciarestia te chel paisc, y ara ti jea der mal. [...] ¹⁷Danló él jü ete te se enstes y á dit: Tan de oras de mio pere á pa plü co assá da mangé, y iu möri atló da fan. ¹⁸I ó pié ia y jí da mio pere y ti dí: Pere, i á fat picé cuntra le ci y cuntra te. ¹⁹I ne sun nia plü degn da ester to fi; tolemo sö desco önn de tü oras. ²⁰Spo él pié ia y é jü da so pere. Le pere l'á belo odü gnenn dalunc adalerch, y s'al mená picé. Dlun saltenn ti él jü adancuntra, ti é salté encer le col y l'á bajé. ²¹Y le fi á dit: Pere, i á fat picé cuntra le ci y cuntra té; i ne sun nia plü degn de ester to fi. [...]



Le pere l'á belo odü gnenn dalunc adalerch, y s'al mená picé. Dlun saltenn ti él jü adancuntra, ti é salté encer le col y l'á bajé.

Lc 15, 20

📖 **Letöres dla Quinta domegna de Carsema:**
Is 43, 16–21 | Fil 3, 8–14 | Jan 8, 8–11

Edema liturgica dai 30.03. ai 06.04.2025	
DOM 30.	Cuarta domegna de Carsema "Laetare" <i>Diemut, Roswita</i> De dal Seminar
08:15 ora da disté!	gran messa por dōta la ploania → oferta por le Kassian Tschiederer Werk s.m. por † Carlo Kehrer, Tistler/Monza s.m. por †† Maria, Nane, Rosa, Mario Rubatscher, La Sala s.m. por † Vitoria Daverda ved. Rubatscher, Framacia
10:00	gran messa a Al Plan
Lön 31.	<i>Cornelia, Guido, Benjamin</i>
→ 07:45	s.m. dai scolari s.m. por †† d'Ansele s.m. por † Isidoro Pedevilla, Brach
Ded 01.	<i>Irene, Hugo, Gilbert</i>
07:30	s.m. a Antermeia
Dem 02.	<i>Francesch de Paola, Maria d'Egit</i>
→ 14:30	Via Crucis con le KVV Seniorenclub
Jöb 03.	<i>Richard, Elisabeth Koch - de d'oraziun do vocaziuns</i>
→ 19:00	funziun penitenziala por dōta la comunité
Ven 04.	pröm vendres - <i>Isidor, Konrad, Heinrich Richter</i>
07:30	s.m. a Al Plan
→	signor ploan vá a proveder
→ 19:00	funziun de Carsema (Joneza)
Sab 05.	<i>Vinzenz Ferrer, Crescentia, Iuliana</i>
07:30	s.m. por † Paul Pedevilla, La Munt s.m. por † Maria Willeit ved. Frontull, Mareo
18:00	s.m. prefestia a Al Plan
DOM 06.	Cuinta domegna de Carsema <i>Zelestin, Sisto, Wilhelm</i>
08:15	zelebrazion dla parora de Dio oferta por la ploania
10:00	gran messa a Al Plan
→ 19:00	Les Staziuns, con grups y uniuns
ampola:	por † Paul Pedevilla, La Munt
ministronc:	• lönesc y sabeda: Fynn y Mattia • domegna: David y Nicole, Manuel y Maria E.
i recordun:	Giovanni (Hans) Agostini, <i>Valsperch</i> † 31.03.2023 Maria Cecilia Willeit, <i>Bornech</i> † 02.04.2019 Maria Kehrer ved. <i>Vollmann</i> † 04.04.2017



Ci t'él pa pordert tomé ete?

I ponsi do

Cösta é öna dles plü beles perts dal Vangelo: ara descrí la storia d'umanité co sciampa da Chel Bel Dio y ven endô zoruch tal momont dal debojügn. Mo dandadöt baiera dla misericordia y dla bunté de Chel Bel Dio, co tól sö düc y pordona. I ne desson mai ponsé che Chel Bel Dio sii en iudicadú dür. Le pentimont sonzier y l'umilté le fej gní ciamó plü generus y desponü a pordené nüsc fai.


I preii ensciö

I oress damané al jonn dla parabola: „Ciodi tan este pa jü demez y as lascé en te bun pere?“ Massa bun, paziont y plen de comprenjiun. Al t'â creta y respetâ töa liberté. Nüsc peri ne s'ess sogü nia dé nosta pert de ierpejun! Y spo canch'i fossen gnüs zoruch: se gní adancuntra? en abrac? na festa? - Ma dai! Vire con en te pere foss sté desco sté te paraisc. Y empó t'an este jü. O magari, miú, san sunse jüs. Poa, deache cösta é nosta storia, chera de nos düc, de nosta püra umanité. Y se stun saorí con Chel Bel Dio, mo i orun plü ienn se destaché da d'el y gni tratés nia desco fis mo piec co stlavs. Ví adencuntra, Signur, ciamó denant che nos podunse fá en vare cuntra te. Pordonesse, no ma por i picés ch'i án fat, mo ince por nosta manciaza de furbizia sc'i orun se destaché da n te pere desco tö.



Con la Sacra Scritöra tres la Carsema (4)

lácob y Esaú, Génesi, 25, 19-34



Ö = Ö, Ü = Ü

1. Canche Ísach â 40 agn maridâl ... na jona fora de söa parontela.
2. Ísach y söa fomena ciefâ jomelins. Al prömnasciü ti metei ennom ...
3. Al secundo ti metei ennom ...
4. Esaú â i ciaveis ... y la pel groia da ploan.
5. Canch'al ea gnü gran jea Esaú ala ... de tiers salvar y ti portâ cern a so pere.
6. lácob stea trep tomp te ... pa söa oma.
7. ... ti orea plü bun a Esaú, le prömnasciü.
8. Rebéca â plü ligreza con ... y sperâ che chel ierpass en de döt cant.
9. En de â lácob motü sora na bona ...
10. Danló roâ Esaú adalerch dla ciacia con na gran fan y dijea a lácob: „ ... la jopa, te pos avei döt ci che t'os lassora!“
11. Danló dijea lácob: „I t'la dá sce tö mo das spo la rajun dal ...“